

VENDIM
Nr. 100, datë 11.2.2026

**PËR PËRCAKTIMIN E KRITEREVE DHE TË PROCEDURAVE PËR DHËNIEN
E STATUSIT “QENDËR EKSELENCE”**

Në mbështetje të nenit 100 të Kushtetutës dhe të pikës 1, të nenit 22, të ligjit nr. 109/2024, “Për shkencën dhe kërkimin shkencor në Republikën e Shqipërisë”, me propozimin e ministrit të Arsimit, Këshilli i Ministrave

VENDOSI:

1. Përcaktimin e kriterëve dhe të procedurave për dhënie e statusit “Qendër ekselence” instituteve dhe njësive të veçanta të kërkimit shkencor për rezultate të spikatura në nivel kombëtar ose ndërkombëtar në fushën e kërkimit apo për zhvillimin e kërkimit shkencor në fusha prioritare.

2. Statusi “Qendër ekselence” jepet me afat të përkohshëm ose të përhershëm për institutet dhe njësitë e veçanta të kërkimit shkencor, që zhvillojnë kërkim shkencor në fusha prioritare, si më poshtë vijon:

a) Për rezultate të spikatura në nivel kombëtar, statusi jepet për një periudhë 5-(pesë)-vjeçare me të drejtë rinovimi;

b) Për rezultate të spikatura në nivel ndërkombëtar, në kuadër të pjesëmarrjes në projekte ndërkombëtare me kohëzgjatje jo më pak se 3 (tre) vjet, statusi jepet i përhershëm.

3. Për të fituar statusin “Qendër ekselence”, instituti ose njësia e veçantë e kërkimit shkencor duhet të përmbushë kriteret e mëposhtme:

a) Të jetë e regjistruar në Regjistrin Kombëtar të Institucioneve, Instituteve, Njësive të Veçanta të Kërkimit Shkencor dhe Kërkuesve Shkencorë;

b) Të plotësojë kriteret shkencore dhe bibliometrike, si më poshtë vijon:

i. të kryejë veprimtari të kërkimit shkencor në një nga fushat prioritare ose të ketë rezultate të spikatura në nivel kombëtar ose ndërkombëtar në fushën e kërkimit;

ii. të ketë publikuar të paktën 3 (tri) botime ose artikuj shkencorë në vit, në revista ndërkombëtare të indeksuara ose në revista kombëtare të kategorive A ose B;

iii. të ketë të paktën 1 (një) projekt kërkimor në zbatim, financuar nga programi kuadër i Bashkimit Evropian për kërkimin shkencor dhe inovacionin dhe të paktën 3 (tri) projekte të financuara nga programet kombëtare të kërkimit shkencor dhe të inovacionit;

iv. të ketë marrëveshje bashkëpunimi shkencor me partnerë ndërkombëtarë ose kombëtarë;

c) Të plotësojë kriteret në burime njerëzore, si më poshtë vijon:

i. të ketë të paktën 1 (një) drejtues kërkimor-shkencor;

ii. të ketë procedura dhe mekanizma të miratuar me vendim të organeve drejtuese për sigurimin e barazisë gjinore dhe mbështetjen e zhvillimit të kërkuesve të rinj;

ç) Të plotësojë kriteret infrastrukturore, si më poshtë vijon:

i. të ketë infrastrukturë kërkimore dhe të përfshijë zgjidhjet më të mira teknologjike të disponueshme;

ii. të disponojë bibliotekë (fizike ose digjitale) me një fond bashkëkohor të literaturës në fushën specifike të kërkimit shkencor;

iii. të ketë revistë shkencore kombëtare të indeksuar në kategorinë A;

iv. të ketë procedura të miratuara me vendim të organeve drejtuese për përdorimin e hapur të laboratorëve, të pajisjeve të veçanta ose të bibliotekës;

d) Të plotësojë kriteret administrative dhe të transparencës, si më poshtë vijon:

i. të ketë strukturën e nevojshme administrative për veprimtarinë e “Qendrës së ekselencës”;

ii. të ketë një projektpropozim të miratuar me vendim të organeve drejtuese;

iii. të ketë procedura dhe mekanizma, për zbatimin e kodit të etikës dhe sigurimin e shkencës së hapur, miratuar me vendim të organeve drejtuese;

dh) Të plotësojë kriteret e ndikimit në shoqëri dhe inovacion, duke ofruar përfitime për komunitetin, industrinë dhe politikat publike, duke pasur të paktën 1 (një) patentë ose 1 (një) marrëveshje bashkëpunimi me industrinë për një produkt ose proces inovativ.

4. Për përfitimin e statusit “Qendër ekselence” zbatohet procedura e mëposhtme:

a) Kërkesa për përfitimin e statusit “Qendër ekselence” bëhet në ministrinë përgjegjëse për çështjet e shkencës e të kërkimit shkencor, nëpërmjet portalit “*e-Albania*”, e shoqëruar me:

i. dokumentacionin që provon përmbushjen e kriterëve të përcaktuara në pikën 3 të këtij vendimi;

ii. raportin e fundit të auditit financiar;

iii. planin strategjik për zhvillimin e “Qendrës së ekselencës”;

b) Ministria përgjegjëse për çështjet e shkencës dhe të kërkimit shkencor ngre, për çdo kërkesë për përfitimin e statusit “Qendër ekselence”, komisionin e posaçëm të vlerësimit për dhënien e statusit “Qendër ekselence” me 5 (pesë) anëtarë, me këtë përbërje:

i. 2 (dy) përfaqësues të ministrisë përgjegjëse për çështjet e shkencës dhe të kërkimit shkencor, të cilët u përkasin strukturave përgjegjëse për kërkimin shkencor;

ii. 1 (një) përfaqësues të Agjencisë Kombëtare të Kërkimit Shkencor dhe Inovacionit, i cili i përket strukturës së vlerësimit të projekteve të kërkimit shkencor;

iii. 2 (dy) ekspertë të pavarur të zgjedhur nga lista e ekspertëve të Agjencisë Kombëtare të Kërkimit Shkencor dhe Inovacionit, që zotërojnë titull akademik dhe janë me përvojë në fushën e veprimtarisë që mbulon instituti apo njësia e veçantë e kërkimit shkencor që ka kërkuar dhënien e statusit “Qendër ekselence”;

c) Komisioni i posaçëm i vlerësimit për dhënien e statusit “Qendër ekselence” ka këto përgjegjësi:

i. ushtron kontrollin administrativ të dokumentacionit;

ii. verifikon përmbushjen e kriterëve të përcaktuara në këtë vendim brenda 7 (shtatë) ditëve dhe, në rast të mungesës së dokumentacionit, i kërkon subjektit kërkues plotësimin e tij brenda 10 (dhjetë) ditëve;

iii. harton raportin për rezultatet e vlerësimit dhe rekomandimin për dhënien ose mosdhënien e statusit “Qendër ekselence”, duke specifikuar periudhën 5-(pesë-)-vjeçare ose me afat të përhershëm;

iv. të qëndrojnë në detyrë deri në dorëzimin e raportit të vlerësimit ministrit përgjegjës për çështjet e shkencës e të kërkimit shkencor;

ç) Ministri përgjegjës për çështjet e shkencës dhe të kërkimit shkencor, bazuar në raportin e komisionit të vlerësimit, vendos refuzimin ose miratimin e propozimit për dhënien e statusit “Qendër ekselence” dhe ndjek procedurat për miratimin e projektvendimit në Këshillin e Ministrave;

d) Subjekti, të cilit i është refuzuar kërkesa për dhënien e statusit “Qendër ekselence”, ka të drejtën e ankimit brenda 30 (tridhjetë) ditëve pranë ministrisë përgjegjëse për çështjet e shkencës e të kërkimit shkencor, në përputhje me përcaktimet e Kodit të Procedurave Administrative.

5. Procedura e aplikimit sipas këtij vendimi, nëpërmjet portalit unik qeveritar “*e-Albania*”, zbatohet pasi ministria përgjegjëse për çështjet e shkencës e të kërkimit shkencor të publikojë në Buletinin e Njoftimeve Zyrtare përfundimin e zhvillimeve teknike për realizimin e procedurës në Sistemin Shqiptar të Informacionit të Kërkimit Shkencor (ACRIS).

6. Kërkesa për përfitimin e statusit “Qendër ekselence” së bashku me dokumentacionin paraqiten në formë të shkruar pranë ministrisë përgjegjëse për shkencën e kërkimin shkencor, duke ndjekur procedurën administrative të përcaktuar në këtë vendim, deri në momentin e implementimit të funksionalitetit të Sistemit Shqiptar të Informacionit të Kërkimit Shkencor (ACRIS).

7. Ngarkohen ministria përgjegjëse për çështjet e shkencës e të kërkimit shkencor, Agjencia Kombëtare e Kërkimit Shkencor dhe Inovacionit, si dhe institutet e njësitë e veçanta të kërkimit shkencor për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama